

**Терроризмын эсрэг хамтдаа
АНУ-ЫН ЭСЯ-НЫ ХЭРГИЙГ ТҮР ХАМААРАГЧ Брайан Гоулдбек)**

2001 оны 9-р сарын 11-ний террорист халдлага болсноос хойш 5 дахь жилийн нүүр үзэж байгаа энэ өдөр дэлхий нийтээрээ террористуудын бүхий л үйлдлийг нэгэн дуугаар зэмлэн буруушаахад тохиromжтой мөч тохиож байна. Түүнчлэн энэхүү гунигт ой нь дэлхий даяараа эсэргүүцэн зогсох ёстой алан хядагчдын энэрэнгүй бус үйлдлийн талаар эргэцүүлэн тунгааж, үзэн ядалт, хорлон сүйтгэлт, үхэл хагацалд хүргэдэг үзэл санаатай тэмцэхэд олон улсын хамтын нийгэмлэгт тулгарч буй нийтлэг бэрхшээлүүдийг хамтдаа хэлэлцэх боломжийг олгож байна.

Терроризм хэнийг ч ялгалгүй нэрвэдэг. 9-р сарын 11-ний өдөр 90 гаруй орны иргэд, янз бүрийн шашин шүтлэгтэй хүмүүс уг халдлагын золиос болсон юм. Индонезээс эхлээд Морокко, Испани, Йордан, Англи, Энэтхэг, Египет хүртэл дэлхийн олон улсын гэм зэмгүй ард иргэдэд эмгэнэл, сүйрэл, үхэл хагацал, уй гашууг терроризм авчирсан. АНУ болон бидний найз нөхөд, холбоотнуудын эсрэг террорист үйл ажиллагаа Афганистанд Ал Кайдаг орогнуулж байсан Талибын дэглэм, түүнчлэн Ирак дахь Саддам Хусейны бурангуй дэглэмийг устгах ажиллагаа явуулахаас бүр өмнө эхэлсэн гэж хэлж болно. 9-р сарын 11-ний өдрийн халдлагыг зохион байгуулагчид болон саяхан Лондон хотод нисэх онгоцуудыг дэлбэлэхээр төлөвлөж байсан этгээдүүд дандаа гэм зэмгүй хүмүүсийг онилж байсан.

Терроризмын эсрэг тэмцэл нь дэлхий нийтийн үнэт зүйлс, зарчим, үзэл баримтлалыг хамгаалах хамтын тэмцэл юм. АНУ төгс төгөлдөр болох болоогүй. Гэхдээ биднийг удирдан чиглүүлж буй эрх чөлөө, шударга ёсны зарчим бусад улс түмнүүдэд ч мөн адил тэгш үйлчлэнэ гэдэгт бид итгэдэг юм. Биднийг хуваан бутаргахаас илүүтэйгээр дэлхийн иргэдийн хувьд нэгдэн нийлүүлэх зүйл хавьгүй их байна. Бид хил хязгаараас үл хамааран хүмүүнлэг ёсны нийтлэг зарчмуудыг хуваалцаж байна. Бидний арьсны өнгө, хэл яриа, эсвэл шашин шүтлэг маань өөр байж болно. Гэвч хүн бүр хүсэл бодлоо илэрхийлж, нийгмийнхээ амьдралд оролцож, шүтэн бишрэх эрх чөлөөтэй байж, аюулгүй тайван орчинд амьдарч, боловсрол эзэмшиж, ажил төрөл эрхэлж, гэр бүлийнхээ төлөө илүү боломжийг эрэлхийлэх хүсэл эрмэлзэлтэй байдаг. .

Ислам, Будда, Христ, Иуд зэрэг шашны томоохон урсгалууд бүгд нийгмийн шударга ёс, энэрэл нигүүсэл, ядуу зүдүү хүмүүсийг хайрлах, тэдэнд туслах, гэр бүл, ард иргэдээ хайрлан хүндэтгэх тухай номлодог. Түүнчлэн амьдрал бол үнэ цэнэтэй зүйл, бусдын болон өөрийн амийг егүүтгэх нь буруу зүйл хэмээн зааж сургадаг.

Бид 2001 оны 9-р сарын 11-ний өдрийг эргэн дурсахын сацуу ирээдүйгээ сайн сайхнаар төсөөлдөг. 9-р сарын 11-ний халдлага болсноос хойш даруй 5 жил өнгөрчээ. Энэ хугацаанд терроризмын эсрэг тэмцэл нь тийм амар хялбар бөгөөд богинохон хугацаанд хийгээд өнгөрөх зүйл биш нь харагдлаа. Мөн ардчилсан аливаа улс бүхэн уг тэмцэлд үзэгчийн байр сууринаас хандах боломжгүй гэдэг нь маш тодорхой харагдаж байна. Үзэн ядалтын үзэл санааг халж, итгэл найдвар, боломж бололцоог төрүүлэх тийм орчинг бурдүүлэхийн төлөө бүх улс орон, ард түмнүүдтэй хамтран ажиллахыг бид эрмэлзэж байна. Эвслийн цэргийн хүчин Афганистан, Иракийн засгийн газрын хүсэлтээр дээрх улсуудад байсаар байгаа бөгөөд тэдгээр улсуудын ард түмэнд өөрсдийн шинэ тулгар ардчилсан улсыг байгуулж, эрх чөлөөнийх нь дайсан болсон алан хядагчдаас өөрсдийгөө хамгаалах зэвсэгт хүчинтэй болоход нь тусалж байна. Эрх чөлөө, энх тайванд учруулж буй террористуудын аюул заналыг сөрөн зогсох асуудал үндэсний ашиг сонирхолд нь нийцэж буйг Монгол улс хүлээн зөвшөөрсөн бөгөөд ийм хамтрагчтай байгаадаа АНУ баярлаж, бахархаж байдаг.